1564. February 19. EDWARD SINCLAIR against WILLIAM SINCLAIR.

No. 45.

Attour ane woman, beand minor, and havand curatouris, may be callit and persewit without thame, gif scho be cled with ane husband; because quhen ony woman havand curatouris maryis, the office of hir curatouris expyris, and scho is under the powar of hir husband during his life-time; and thairfoir in sic caissis it is sufficient to summound hir, and hir husband for his interesse.

Balfour, p. 125.

1564. July 26.

ARCHIBALD MAKNEILL against James Macneill his Father.

No. 46.

The sone beand minor, and havand contractis or uther busines to be performit for his proffeit and weill, betwix him and his father, the quhilk cannot be done without curatouris, he may desire befoir ane Judge, curatouris to be gevin to him, ane or ma, to that effect; because the father, albeit he be curatour be the law to his sone, zit, beand partie, may not be curatour in rem suam.

Balfour, p. 124.

** The like found 3d June, 1561, The Maister of Cathnes against The Earl of Cathnes. IRIDEM.

1564. July.

George Heriot against Andro Libertoun and Williams Thomson his Curatouris.

No. 47.

Curatouris beand chosin befoir ane Judge, and gevin to ane minor, and thairefter wastand or destroyand the minoris landis, gudis and geir, or sufferand the samin negligentlie to perish or decay, to his heavie hurt and skaith, may be callit and persewit be the minor at ony time befoir the ische and out-ryning of thair office of curatorie, or thairefter, for the damnage and skaith sustenit be him thair-throw: Bot gif he wald persew thame befoir his perfyte age of xxi zeiris, he may not, without the assistance of uther curatouris, be ressoun of his non-age: Thairfoir he may call thame befoir a Judge, to se thame revokit and removit fra all farther administratioun, for the cause foirsaid; and the samin beand sufficientlie provin, he may revoke the said curatouris chosin be him of befoir, and befoir the Judge may choose and elect utheris curatouris in thair places, for guyding and reuling of him be thair counsall, assistance, and defence, in quhatsumever his actiounis and busines, until his perfyte age of xxi zeiris.

Balfour, p. 124.